

# 唐詩十首

Ten Tang Dynasty Poems

## 1. 靜夜思

【李白】

床前明月光，  
疑是地上霜。  
舉頭望明月，  
低頭思故鄉。

## 2. 春曉

【孟浩然】

春眠不覺曉，  
處處聞啼鳥。  
夜來風雨聲，  
花落知多少。

## 3. 登鶴雀樓

【王之渙】

白日依山盡，  
黃河入海流。  
欲窮千里目，  
更上一層樓。

## 4. 相思

【王維】

紅豆生南國，  
春來發幾枝。  
願君多采擷，  
此物最相思。

## 5. 憫農（其二）

【李紳】

鋤禾日當午，  
汗滴禾下土。  
誰知盤中飧，  
粒粒皆辛苦。

## 6. 江雪

【柳宗元】

千山鳥飛絕，  
萬徑人蹤滅。  
孤舟蓑笠翁，  
獨釣寒江雪。

## 7. 楓橋夜泊

【張繼】

月落烏啼霜滿天，  
江楓漁火對愁眠。  
姑蘇城外寒山寺，  
夜半鐘聲到客船。

## 8. 送元二使安西

【王維】

渭城朝雨浥輕塵，  
客舍青青柳色新。  
勸君更盡一杯酒，  
西出陽關無故人。

## 9. 出塞

【王昌齡】

秦時明月漢時關，  
萬里長征人未還。  
但使龍城飛將在，  
不教胡馬度陰山。

## 10. 回鄉偶書

【賀知章】

少小離家老大回，  
鄉音無改鬢毛衰。  
兒童相見不相識，  
笑問客從何處來。